

احمقاں دی صحبت تھیں دوڑ رہنا چاہیدا

ہک دفعہ حضرت عیسیٰ ہک پہاڑی دی طرف دوڑ رہے آسے۔ لگدا آسا کہ کوئی سپنہہ اُنہاں چکھا دوڑ رہیا ہے۔ ہک شخص اُنہاں چکھا دوڑیا ہووڑ چکھیا کہ یا حضرت تُّساں چکھا کوئی نیہہ فُرتسیں کیاں دوڑ رہے ہو۔ حضرت عیسیٰ سُن اُس شخص دی گل اَن سنی کر چھوڑی ہووڑ پہاڑی دی طرف دوڑ دے رہے۔ اوہ شخص تُّساں دی تیز رفتاری دا ساتھ نہ دے سکیا تہ دُروں واز دیتی کہ اے اللہ دے نبی خدا واسطے ہک چھٹ کھلو۔ میں تُّساں چکھا نہ دوڑ سکدا۔ بس اتنا دَہس چھوڑو کہ تُّسیں اس طراں کیاں دوڑ رہے ہو۔ جد کہ تُّساں چکھا کوئی سپنہہ نیہہ ہے نہ کوئی دُشمن۔

حضرت عیسیٰ سُن فرمایا کہ میں احمق آدمی تھیں نس رہیا ہاں، توں ماہڑے رستے بچ نہ آئیں۔

اُس شخص آکھیا ”یا حضرت کہ تئیں مسیح نہ او جہاں تھیں اَنے ہور
ڈورے شفا حاصل کر دے ہین؟“

حضرت عیسیٰ فرمایا ”ہاں“۔

اُس شخص آکھیا ”یا حضرت تئساں کول اوہ طاقت نیہہ کہ تئیں مردے
تے کلام الہی پڑھدے ہوتے مردہ زندہ ہو گیندا ہے؟“

حضرت عیسیٰ فرمایا ”ہاں میں اوہی ہاں“۔

اُس شخص آکھیا کہ ”تئیں اوہ نہ او کہ مٹی دے پکھڑوں بنا کا اُنہاں تے
دم کر چھوڑو تے اوہ اُس وقت ہوانچ اڈنا شروع کر کھندے ہین؟“

حضرت عیسیٰ فرمایا ”بے شک میں اوہی ہاں“۔

فر اُس شخص سُن پچھیا کہ ”اللہ تعالیٰ سُن تئساں کو اس قدر قوت عطا کیتی
دی ہے تہ فر تئساں کو کس دا خوف ہے۔“

حضرت عیسیٰ علیہ السلام سُن فرمایا کہ ”اُس رب العزت دی قسم کہ جس
دے اسم اعظم کو میں اُنھیاں ہور ڈوریاں تے پڑھیا تہ اوہ ٹھیک ہو گئے۔

پہاڑاں تے پڑھیا تہ اوہ پھٹ گئے مردیاں تے پڑھیا تہ اوہ جی اُٹھے۔ اوہی
اسم اعظم میں احمق تے لکھاں وار پڑھیا اُس تے کوئی اثر نہ ہویا۔“

اُس شخص حیرت نال پُچھیا ”یا حضرت ایہہ کہہ گل ہے کہ خدا داناں
انھیاں ڈوریاں ہو رُردیاں وغیرہ تے اثر کردا ہے مگر احمق تے کوئی اثر
نیہہ کردا۔ حالانکہ حماقت بھی ہک مرض ہے ہو راسم اعظم سب مرضاں دی
دوا ہے۔“

حضرت عیسیٰؑ فرمایا کہ احمق دی بیماری تے خدا دا قہر ہے۔ اس دے
برعکس اُنھاں ہونا محض ہک مصیبت ہے۔ جیہڑا شخص مصیبت بچ پھس گچھا اُس
دی مصیبت بالآخر اُس واسطے رحمت ثابت ہوندی ہے ہو ر جیہڑا احمق بچ
گرفتار ہو گیا اُس واسطے زحمتاں ہی زحمتاں ہن۔

بچو! تسیں بھی حضرت عیسیٰؑ دی طراں احمقاں تھیں دُورسو۔ احمقاں
دی صحبت سُن بڑے بڑے فتنے ہو ر فتور پیدا کیتے۔ احمق دی مصیبت انسان کو
تباہ کر چھوڑی دی ہے ہو ر رحمت اس منحوس دے نیڑے بھی نیہہ ایندی۔ جس
طراں ہوا ہولیاں ہولیاں پانیاں کو خشک کر چھوڑ دی ہے اسی طراں احمق دی
صحبت بھی انسان دی تمام صلاحیتاں کو ختم کر چھوڑ دی ہے۔ حضرت عیسیٰؑ دا
احمق تھیں دُور نساں فی الحقیقت کسے خوف دی وجہ نال نہ آسا، بلکہ اوہ لوکاں کو
سبق دینے واسطے آسا۔

1۔ اوہکھے لفظاں نامطلب:

احمق	: بے وقوف
صحت	: سنگ
احمقی	: بے وقوفی دی بیماری
زحمت	: مصیبت
منحوس	: بد بخت
صلاحیتاں	: خوبیاں
حیرت	: پریشانی
قوت	: طاقت
عطا	: بخشش
پکھڑوں	: پرندے، پنچھی
کلام الہی	: اللہ دا کلام

2۔ مندرجہ ذیل سوالاں نے جواب دیو:

- (۱) حضرت عیسیٰؑ کون آسے؟
- (۲) حضرت عیسیٰؑ دے کہہ کہہ معجزے آسے؟

- (۳) حضرت عیسیٰؑ کیاں دوڑ رہے آسے؟
- (۴) اسم اعظم کہہ ہے۔
- (۵) اُس شخص حضرت عیسیٰؑ کولوں کہہ پُچھیا؟
- (۶) مٹی دے بنائے دے پکھڑوں کسراں اُڈ دے آسے؟
- (۷) کہہ حماقت بھی ہک مرض ہے؟
- (۸) حضرت عیسیٰؑ کے جواب دیتا؟
- (۹) اُس شخص حضرت عیسیٰؑ کولوں دُوا کہہ سوال پُچھیا؟

3۔ خالی جگہاں کی پھرو:

- (۱) حماقت بھی ہک ہے۔
- (۲) احمق دی بیماری تے خدا دا ہے۔
- (۳) مگر احمق تہ کوئی نیہہ ہوندا۔
- (۴) حضرت عیسیٰؑ دی طراں تھیں دور نسو۔
- (۵) ہور اُس دے نیڑے بھی نیہہ ایندی۔

